



## **ODRŽANA KONFERENCIJA ZA MEDIJE**

### **Predstavljeni rezultati rada Tužilaštva za 2023. godinu**

(Brčko, 9.2.2024. godine)

Tužilaštvo Brčko distrikta BiH održalo je juče konferenciju za medije na kojoj su predstavljeni rezultati rada ove pravosudne institucije u proteklom periodu, s fokusom na prošlu godinu. Govornici na konferenciji bili su glavni tužilac Zekerija Mujkanović i tužilac iz Odsjeka za organizirani kriminal, privredni kriminal i korupciju Pavo Radoš. Na konferenciji je prezentiran godišnji izvještaj o radu za 2023. godinu, s akcentom na obim i kvalitet rada, brzinu okončanja istraga, kao i na procesuiranje i sankcioniranje korupcije i predmeta ratnih zločina.

Govoreći o izvještaju o radu, glavni tužilac istakao je da je kvalitet rada ovog tužilaštva već godinama na visokom nivou od preko 95%, pojasnivši da na svakih 100 podignutih optužnica njih čak 95 rezultira osuđujućom presudom. Ukupan broj podignutih optužnica u prošloj godini veći je u odnosu na prethodnu godinu za 11% i iznosi 219. Samo jedna optužnica nije potvrđena. Uz visok kvalitet rada, Mujkanović je istakao i da je kvantitet tužilačkog rada na zavidnom nivou, naglasivši kako kolektivna norma ove institucije već drugu godinu zaredom značajno nadilazi propisane okvire. Iako je i prošle godine rad Tužilaštva bio otežan, usljed nepopunjenosti tužilačkih funkcija, prosjek ostvarenja norme po tužiocu, odnosno kolektivna norma, iznosi visokih 109,06%. Na ove ključne parametre, po kojima se inače ocjenjuje uspješnost rada svih tužilaštava u BiH, Mujkanović je dodao da brčansko tužilaštvo osmu godinu zaredom uspijeva riješiti svaku zaprimljenu prijavu u roku od svega nekoliko dana. S obzirom na način organizacije rada i provođenja unutrašnjeg nadzora, prijave se uglavnom rješavaju otvaranjem istraga, koje se u nadalje u pravilu brzo sprovedu, u roku od šest mjeseci, pri čemu nema zastare krivičnog gonjenja.

„Posmatrajući konkretno istrage ratnih zločina, za istaći je da je prošlogodišnji plan ispunjen u stopostotnom iznosu, tako da je ostao u radu samo jedan predmet po poznatom počiniocu koji je nedostupan. Na nivou Distrikta praktično je realizirana Državna strategije za rad na predmetima ratnih zločina, pri čemu su najsloženiji predmeti haške oznake A riješeni još prije deset godina. Tužilaštvo nastavlja intenzivan rad na 72 predmeta ratnih zločina po nepoznatom počiniocu, od kojih je najveći broj ustupljen s nivoa pravosuđa BiH“ - naveo je Mujkanović. Akcentirajući predmete korupcije, on je iznio podatak da je u prošloj godini podignuto osam optužnica protiv dvanaest osoba, te da je procesuiranje koruptivnih krivičnih djela i dalje apsolutni prioritet u radu ovog tužilaštva. On je dodao da se u ovom broju, značajan udio odnosi na malverzacije pri dodjeli i trošenju grantova namijenjenih za rad udruženja građana, nakon čega je o radu Tužilaštva u ovom specifičnom segmentu govorio tužilac Radoš. On je istakao da su, nezavisno od informacija koje su kasnije pojavile u javnosti i istraživačkim medijima, istrage ovog fenomena započete još 2017. godine, kada su u ovom tužilaštvu otvoreni prvi predmeti. Od tada ih je formirano više od dvadeset, od čega su u devet predmeta podignute optužnice. Četiri optužnice već su rezultirale pravosudnim osuđujućim presudama, uz uglavnom istovremeno izricanje počiniocima zatvorskih i novčanih kazni. Ukupna imovinska korist obuhvaćena optužnicama je preko 473.000,00 KM, dok u tekućim istragama ona iznosi dodatnih 300.000,00 KM. Sve istražne aktivnosti pokrenute su i vođene po službenoj dužnosti, u saradnji s Policijom Brčko distrikta BiH. Na konferenciji je posebno istaknut temeljit pristup i saradnja tužilačko-policijskog tima u istraživanju zloupotreba budžetskih grantova, a ukazano je i na značaj istraživačkog novinarstva koji je u ovoj oblasti dokazala redakcija CIN-a iz Sarajeva.

Odgovarajući na pitanja novinara, tužiocu su na konferenciji govorili i o procesuiranju izbornih prevara, u odnosu na koje je ovo tužilaštvo ranije ostvarilo najznačajnije rezultate u BiH, ali i neriješenim ubistvima, korupciji u zapošljavanju u javnom sektoru, te ostalim temama za koje su mediji iskazali interesovanje.

**GLAVNI TUŽILAC**  
**ZEKERIJA MUJKANović**